



# Tir Yimym

www.tiryimym.in

Regd. No. RNI. NAGAAO/2004/13113. Postal-NE/RN-717.

e-mail : tiryimym@gmail.com

TAPAK 3

Yangia anidakangma : Tir Yimym

tiryimym@aolima

tir yimym

TAPAK 7

**Delhi CM Kejriwal-i jail nung insulin atema Delhi court dang mepishir**

**Donald Trump ken o jembitsü obendangertem shimogo**



VOL. XXI ISSUE NO. 187 (ADOK 187) DIMAPUR KÜPTOKNÜ (SATURDAY) RONGCHII (APRIL) 20, 2024 ₹ 5.00

## Nagaland nung voting percentage 56% dang liasü; Eastern Nagaland nungeri khenyongi shilem magi



(Abelen) Indian National Congress candidate S. Süpongmeren Jamir-i pa vote School Compound, Longsa nung ajener külen tangokba noksa nung angur. (Achiji) NDPP candidate Dr. Chumben Murry-i SMB High School, Wokha nung vote ajenba sülen agiba noksa angur.



**Kohima, April 19, 2024 (TYO):** Nagaland nung Lok Sabha election agia aruba nung tanü shilem agir tajemtiba liasü aser iba ya Eastern Nagaland-i shilem magiba ajanga lir.

Hokolbarnü Lok Sabha polling nung Nagaland nungi overall voting percentage ji 56% dang lir.

Eastern Nagaland Peoples' Organisation (ENPO)-i Lok Sabha Election nung shilem magitsü tetuyuba agütsü aser yashi nikongdang 6:00 nungi mokdang ayongzükä liasü.

Külen, Eastern Nagaland nung

alir voters 4,00,683-ia polling nung shilem magitsü lemtet.

2019 Lok Sabha elections nung voting percentage 83% liasü saka taküm 56% dang lir aser iba ya Nagaland state anguba sülen lowest voting percentage asütsü.

2014 parliamentary elections nung Nagaland-i linük nung voting percentage teimtiba 87.89% nguteta liasü.

Taküm election nung Nagaland nungi candidate 3 lir. Parnok ya NDPP & PDA consensus candidate Dr

Chumben Murry, State Congress president aser INC candidate S. Süpongmeren Jamir aser Independent candidate Hayithung Tungoe Lotha nungeri lir.

"Nagaland nung Lok Sabha menden ka atema election tiptema agiogo aser vote enoktsür 56% shilem agi" ta Hokolbar aonung AWO Ki nung osangbener den senden ka amendang Chief Electoral Officer (CEO) Nagaland, Vyasani R-i ashi.

Tanep 7:00 ako nungi voting maparen tenzük aser tiptema

dang agir nikongdang tembangogo, ta Vyasani ashi.

Asüng polling personnel indang kulikaket ajak reprangba sülen ang final poll percentage metetdaksütsü ta paisa ashi.

March 16, 2024 nungi tenzük Lok Sabha election atema maparen inyaka arudang enforcement agencies aser security forces-i Rs 5 crore jungnua alang drugs aser narcotics puogo ta Vyasani metetdaksü.

Lok Sabha election atema state ajungalen personnel 14,400 aser gari 8,800 amshio go ta paisa shisem.

Taküm election nung balaka inyaktetbaji polling station aika tetsürtem aser PwDs ajanga dang ketdangsüba lir. 10 Northern Angami-I-Assembly Constituency kübok Kohima nung polling station 28 tashi tetsürtemi dang ketdangsüogo ta CEO Nagaland-i ashi.

District 6 kübok polling stations 738 nung vote enoktsür nisung lakh 4 tema lir saka parnoki ENPO den külemi noktaka polling nung shilem magi.

ENPO tesem nung vote enokba osang kecha mali aser külem mepetmesü adokba osanga

mali, ta Vyasani ashi.

Nagaland nung polling station kar nung re-poll asütsü asü ta osangbeneri asüngdangdang "tang tashi nung re-poll asütsü ken o kecha mali saka Honibarnü political party tem lia polling personnel kulikakettem reprangba sülen ang lemtet agitsü" ta Nagaland Parliamentary election Returning Officer Sushil Kumar Patel-i langzü.

"Wokha district nung nisung aseme tangar jilu benshiba atema apuba dak alaka polling maparen tiptema dang agiogo kechiyong March 16 nungi Model Code of Conduct agüja lir" ta Lok Sabha election atema State Nodal Police Officer Limasunep Jamir-ia ashi.

Electronic Voting Machines strong room nung yuogo aser June 4 nü results azüngtsü magizük tashi security forces-i anüksü, ta pai ashi.

"Election magidanga timtem kecha melii dang maparen inyaka aruogo aser polling anogo-a tiptema dang süiogo. Maneni Nagaland nung election tembangba sülen ozüng alema inyaksangshi kecha mataloktsü amanger" ta Limasunep-isa ashi.

## State sorkari ENPO takhangba nung ashishitep kecha mali: CM Neiphiu Rio



**Kohima, April 19, 2024 (TYO):** Nagaland state sorkari ENPO takhangba nung ashishitep kecha mali kechiyong onoki Eastern Nagaland atema tashi balaka meshitsüogo ta Chief Minister Neiphiu Rio-io ashi.

Northern Angami-II constituency kübok Toupheima yimtsüng nung vote enoktsüba sülen Rio-i "Union Home Minister Amit Shah lia FNT indang draft working paper kü nem agütsü" ta ashi.

"Iba draft working paper nung Eastern Nagaland nungi MLA tem aser FNT züngsemtem tsüngda tashi lemsatepba dak alaka tanüngba ajak shitak dang liasü" ta Rio-i ashi.

Nagaland sorkar asoshi takhangba ajanga kecha khuret mali aser sorkari parnok senotsü talila angütsü atema autonomous body ka tentetsü shidangogo ta

pai ashi.

"Onoki tesüiba nung jembiteper lila saka autonomous body ka tentetdang MLA tem den inyaksangshi shitak alitsüla. Iba nung state sorkar mapa kecha mali saka MLA aser ENPO külemi mener inyakyim ka latetsüla saka ibaji parnoki meinyaktet aser draft paper magizük" ta Rio-i ashi.

"Item ya angatettepa sülen ang olemteptsü" ta paisa shisem.

ENPO nungi MLA 20-i vote meinoktsüba atema Nagaland sorkari temerenshi agütsütsü asü masü ta osangbeneri asüngdangdang "onok meinyaktsü kechiyong ENPO-i Eastern Nagaland Legislators Union züngsemtem tetshia tetuyuba agütsüogo. Onoki metokteptsü aser kechi atalokdir repranga atatsü" ta CM Rio-i langzü.

Election nung shilem magiba ajanga FNT maparen nung tetsükdaksü ajurutsü asü koda ta asüngdangdang "parnoki tajungtiba ta bilema mapa inyaker saka India sorkar aser state sorkari tapet mapa inyaktsü" ta Rio-isa langzü.

ENPO-i democratic maparen nung nübortem shilem magidaksüba atema Election Commission-i show cause notice ka agütsüogo, ta paisa ashi.

## ENPO-i law & order tiptemtsü atema mokdang ayong ta kuli agütsür CEO Nagaland-i tarutsü nung ibala mapa meinyaktsü nenshir

**Kohima, April 19, 2024 (TYO):** Eastern Nagaland nungi vote enoktsür nisung lakh 4 temai shilem magiba ajanga Nagaland nung overall voting percentage 56% dang liasü.

ENPO-i law & order tiptem ayutsü atema mokdang ta ashir aser külen election office-i ENPO dang nisung ka indang electoral rights nung timtem magütsütsü shiogo.

April 18, 2024 nikongdang 6:00 ako nungi Eastern Nagaland ajanga mokdangtsü ayongzükba atema Chief Electoral Officer (CEO) Nagaland Vyasani R-i Eastern Nagaland Peoples' Organisation (ENPO) nem show cause notice ka agüja liasü.

Iba atema tanü ENPO president R. Tsapikiu Sangtam-i ashiba agi timtem aser lendongtsüdong nungi kümzükä ayutsü atema mokdang ayongzük.

"Eastern Nagaland nung election mapang meinprong ajema kümdaksütsü aser ozüng alema inyaksangshiba azüoktsü atema public notice agütsü" ta Tsapikiu-i ashi.

Eastern Nagaland ya tang Public Emergency kübok lir aser

mokdang ya Eastern Nagaland nung alirtemi mulunga tenzükba lir ta paisa ashi.

Iba public notice magütsüdang ENPO-i Eastern Nagaland nunger den asüngdangtepogo ta Tsapikiu Sangtam-isa ashi.

April 1 nü ENPO-i Election Commission of India dangi züluba shidi nung Eastern Nagaland nungeri Lok Sabha elections 2024 nung shilem magitsü osang sangoktsüogo ta ENPO-isa CEO Nagaland dang ashi.

Yashi sangdong agütsübaji Eastern Nagaland nung law-and-order tiptema ayutsü aser sensotem lendong nungi kümzükä ayutsü atema liasü ta paisa ashi.

Iba dak sendakba nung IPC 1860 nung Section 171 (c) nung Subsection (1) mapa inyaktsü makok kechiyong ENPO mesüra Eastern Nagaland nungeri aibelen kecha meinyak, ta ENPO president Tsapikiu-isa ashi.

ENPO-i bangzüngtem mesüra tetuyuba inyaktsü tashi kecha mali kechiyong Eastern Nagaland nungeri mulungsoa shilem agia aser angatettepa dang inyaksangshia arur ta paisa ashi.

Onoki inyakba nung

mangatettep mesüra aibelen rasaba lira sasa bilemer aser amaliteptsü. ENPO-i Eastern Nagaland region nung law and order tiptema ayutsü atema olemteptsü aser amalitepa yariteptsü mulunga dang lir ta Tsapikiu-isa metetdaksü.

Lok Sabha 2024 General Elections nung Eastern Nagaland nunga alirtemi vote agütsüba nung timtem agütsüba ka ta Eastern Nagaland Public Emergency Control Room-i public notice agütsübaji züngshitsü akok ta CEO Nagaland Vyasani Hokolbarnü nenshia metetdaksü.

Iba sangdong ya Indian Penal Code 1860 nung Section 171 C nung Sub-Section (1) anema lir kechiyong elections nung masüba mapa inyakogo ta pai ashi.

ENPO President ji Eastern Nagaland Public Emergency Control Room madak ketdangtsür lir anungji Eastern Nagaland Peoples Organisation-i nisung ka indang electoral rights nung meinprong masütsüsa kanga kümdanga inyaksangshitsüla ta CEO Nagaland-isa metetdaksü.

### Power Department Kohima Division ajanga metetdaksür

**Dimapur, Rongchii/April 19 (TYO):** Kohima Transmission Division kübok timtem aser tetsükdaksü kecha majurui power supply agütsütsü mechi April 22, 2024 nungi May 20, 2024 tashi 33kV, 66 kV aser 132kV Transmission lines tem yanglushia arem chidoktsü sentong lir, ta Office of the Executive Engineer, Department of Power, Transmission Division Kohima ajanga nüburttem dang sangdong ka nung metetdaksü.

Iba maparen tajungtiba nung tsükdang-radang makai inyaksü mechi anogoshi anepdang 8:00 ako nungi nikongdang 3:00 ako tashi total power shutdown alitsü.

Anungji iba shutdown mapang consumer aser public temi timtem arema aser tashi angatepa alitsü ayongzüker, ta sangdong ajanga ashi.

Anogo balala nung iba shutdown agi kongshitsü tesemtem yamai alitsü:

April 22 & 23, 2024 anogotem 33kV Jakhama yanglushia arem chidoktsü aser iba mapang Kohima kübok Southern Angami nung kongshitsü, April 24 & 25, 2024 anogotem 33kV KRM-I, April 26 & 27, 2024 anogo nung 33kV KRM-II, April 29, 2024 nungi May 1, 2024 nung 33kV Lalmati & 33kV AP-I - Zubza aser Lalmati area, May 2, 2024 nungi May 4, May

2024 anogotem 33kV Chakhabama yanglushia arem chidoktsü aser iba mapang Chakhabama & Chozuba nung kongshitsü.

May 6, 2024 nungi May 20, 2024 tsungta 33kV Botsa yanglushitsü aser iba mapang Kohima district kübok Northern Angami area kongshitsü, April 25, 2024 nungi April 30, 2024 anogotem 66kV Tuensang- Kiphrie transmission line yanglushia aotsü aser iba mapang Phek & Kiphrie Districts nung kongshitsü aser May1, 2024 nungi May 4, 2024 tashi 132kV Kiphrie - Meluri transmission line yanglutsü aser iba mapang Phek district nung kongshitsü.

### DAYO-i Naga nunger ajunga nem tenüngsang agütsür

**Dimapur, Rongchii/April 19 (TYO):** Lok Sabha election nung nokdakba ya tesunep nung agitetba atema Nagaland nung aliba nüburttem dang pelaba lemsateper, ta Dimapur Ao Youth Elections mapang Organisation (DAYO) sangdong ka ajanga ashi.

Tatishitsü tajung sayua yimya tajung nung democratic maparen inyakba ajanga asen nüburt temi democracy yimya mesamai amshiba aser linük yangerba nung shilem agiba kuli sayur.

ENPO kin temi par tangatetba nung indang-indanga nokdaka election maparen nung shilem magitsü telemtetba agiba atema parnok nem akum agütsür aser onokia nenok tejashi angateter, ta DAYO sangdong ajanga ashi.

Parnoki angatetba aser aginüba nung bendanga sangdong ajangasa ashi.

agütsür temlungtetba tulu nung nokdakba ya tenükshitsüka lir aser tanüngba Naga nunger ajunga ajungmesoba yimya ka alitsü.

Electons mapang rongrongshirong maliba ajanga nüburttem tangatetba nung tain akumba sayuba kisung masü saka tarutsü lanu putu asoshi tatishitsü tajung yutsür. Aroki iba ama mera agia kati ka akumtsübotepba ajanga dang aseni asen democratic institutions tashi itshtitsü aser asenok kin balala tsungta telungjem adokdaksütsü, ta DAYO-i ashi.

Asen nüburttem ajungtsü aser terenlok atema inyaksü mulungtetba lokti ka asünung, asen state tejakleni aotsü aser asen nüburttem ajunga ola angashia akumtsübotsü asoshi maneni inyaksü, ta DAYO sangdong ajangasa ashi.

**Assam nung NCHAC EM ka tenu pua bener ao Guwahati, Rongchii/April 19 (Agencies):** Assam nung Dima Hasao district kübok Haflong nung North Cachar Hills Autonomous Council (NCHAC) indang executive member (EM) Monjit Naiding tenu Prasanjit Naiding pua bener aoba noksa ka social media nung prokshitar.

Pa ya United Dimasa Liberation Army (UDLA) ta sür telok kati pua bener ao ta ashir.

Osang ajanga ashiba agi, Prasanjit Naiding ya Haflong kübok Thajuwari area nung par kidang nungi pua bener ao.

Pua bener aortemi noksa ya prokshia nüburttem shisabulor aser social media sapang balala nung aitsü tenzüko.

Iba maparen dak sendakba nung UDLA telok anema Haflong police station nung FIR ka benoka lir.

Prasanjit Naiding pua bener aoba aser UDLA telok nükjidong tang tashi mejangjateti lir.

### Sontipur nung polling mapang timtem agütsüba mechi tetsür ka apu

**Guwahati, Rongchii/April 19 (Agencies):** Assam nung Sontipur district kübok Na-Duar nung aliba polling booth numbers 215 aser 2016 nung Mustana Begum ta sür tetsür kati vote agütsüba mapang timtem agüja liasü.

Polling booth nung alirtemi ashiba agi, Begum ya polling booth telungi aita nüburttem dang Congress party nem vote agütsütsü ajungmesoa liasü.

Lai yamaji inyakba ajanga polling maparen ajunga nung timtem agütsü aser yangji aliba

polling ketdangsürtemi arua liasü.

Iba tensa nung telangzüba agüja ketdangsür temi ozüng amshirtem jaok aser la apu.

Assam nung Lok Sabha menden 14 aliba nungi April 19, 2024 nü constituency pongu atema vote agütsügo.

2024 Lok Sabha election phase mezüngbuba Hokulbarnü agidang Assam kübok Dibrugarh, Jorhat, Kaziranga, Lakhimpur aser Sonitpur Lok Sabha constituency atema vote agüja liasü.

### DC & DEO Longleng ajanga metetdaksür

**Dimapur, Rongchii/April 19 (TYO):** 18th Lok Sabha elections 2024 dak sendakba nung 1-Nagaland Parliamentary Constituency kübok 49 Tamlu AC aser 50 Longleng AC nung April 20, 2024 nü scrutiny agitsü atema

Addl. Deputy Commissioner & ARO of 49 Tamlu AC, Neilezo Tep nem nungloksür, ta Deputy Commissioner & District Election Officer, Longleng ajanga sangdong ka nung metetdaksü.

### Chozuba nung 18th Lok Sabha election sunepa agiogo



**Dimapur, Rongchii/April 19 (TYO):** 18th Lok Saba election 2024 nung Nagaland nungi menden ka asoshi April 19, 2024 nü election agiba nung Phek district kübok Chozuba sib-division nunga kanga tiptema nüburttemi pei temeden vote

agüja liasü.

Nagaland nungi candidate asem liasü aser nüburttem talenba kecha makai pei mulungba nem vote agütsü aser ketdangsür dangi ashishitep ken o kecha maru, ta sangdong ka ajanga ashi.

## Nagaland nung 18buba Lok Saba election 2024 agiba noksatem



Model Polling Stations, Dimapur - III



Chumoukedima



Mokochung



Mangkolemba



Tuli



Waromung

# Selection mezüngbuba shilem nung voters shilem 60-i vote agütsü



April 19, 2024 nü Chennai nung aliba polling station ka nung Tamil Nadu Chief Minister aser DMK tongti, MK Stalin den pa kinüngtsü nati vote agütsüba sülen temaitsü sayudang tangokba noksa nung angur. Tamil Nadu nung Lok Sabha menden 39 prongla atema election agiogo.

**New Delhi, Rongchii/April 19 (Agencies):** Hokolbarnü states aser union territories 21 nung Lok Sabha menden 102 atema election agiogo; West Bengal aser Manipur tesem kar nungbo rara adoka liasü, ta election ketdangsertemi metetdaksü.

Hokolbarnü Lok Sabha election mezüngbuba shilem nung voters shilem 60 jungnüai vote agütsü aser ibaji 2019 küm election den medemdangra (shilem 69.43) shilem 9 agi ishiba lir.

Hokolbarnü West Bengal kübok Cooch Behar district nung BJP nung inyakertemi Trinamool Congress inyakertem dak azük, ta TMC-i metetdaksü.

Ano Manipur state nunga Thamanpokpi anasa aliba polling station ka nung mejangjaba nisung kari injang khaloktsü aser Iroisemba polling station nunga rara adoka liasü. Ajsüaka Manipur nung voters 67.46 aser West Bengal nung voters shilem 77.57-i vote agütsü.

Ato kilonser Narendra Modi lenisüba kübok BJP-i aniba NDA teloktepi kümsük (term) tasembuba sorkar akümtsü nükjidong nung tokteper aser opposition INDIA teloktepi NDA sorkar atsüngdoktsü nükjidong nung tokteper.

Hokolbarnü Tamil Nadu nunga Lok Sabha menden 39 prongla atema election agiogo. Tamil Nadu nung Ato kilonseri sashia nüboyima liasü.

Hokolbar nikongdang 6:00

ako tashi nung linük nung voters shilem 59.71-i vote agütsü aser voters shilem teimtibai vote agütsüba state ji West Bengal (77.57%) lir.

Tripura nunga voters shilem 76.10 aser Puducherry nung voters shilem 72.84-i vote agütsü. Voters shilem ishitiba vote agütsüba Bihar (46.32%) liasü.

Tanü tongtibang lenirtem aiakti vote agütsüogo; parnok rongnung Congress lenir tain P Chidambaram, par jabaso aser Sivaganga candidate Karti Chidambaram, nungtugu actor Rajinikanth, RSS tongti Mohan Bhagwat, Tamil Nadu Chief Minister aser DMK tongti, MK Stalin nung densema liasü.

Vote agütsüba sülen P Chidambaram-i, INDIA teloktepi Tamil Nadu nung menden 39 prongla nung takok angutsü, ta metetdaksü.

"Tanü election mezüngbuba shilem agir, shilem ajak senteper tenet lir. Tanü Tamil Nadu votes ajak angutsü aser onoki menden ajak nung takok angutsü," ta pai metetdaksü.

Hokolbarnü Tamil Nadu BJP Tir aser Coimbatore menden nungi candidate, K Annamalai-i Karur yim dak Uthupatti polling booth nung vote agütsüba sülen osangbenertem den jembidang pai, "State nung Dravidian yimtenren tembangadokogo. Voters mesüzüksü atema DMK aser AIADMK-i Coimbatore nung sen crore 1,000 dak tema indok," ta aitsü.

Union Minister aser Cooch Behar nungi BJP candidate,

Nisith Pramanik-i vote agütsüba sülen osangbenertem den jembidang, "Ruling Trinamool Congress-i nisungtem polling booths tonga moudaktsütsü atema inyaker. TMC anema nüburtemi nokdaksü renema lir," ta ashi.

Hokolbarnü Lok Sabha election mezüngbuba shilem nung Tamil Nadu nung menden 39 prongla atema election agiogo, Uttarakhand nung Lok Sabha menden pongu, Arunachal Pradesh nung menden ana, Meghalaya nunga ana, Andaman and Nicobar Islands nunga menden ka, Mizoram nung ka, Nagaland nung ka, Puducherry nung ka, Sikkim nung ka aser Lakshadweep nunga menden ka atema election agiogo.

Rajasthan nung menden 12, Uttar Pradesh nung 8, Madhya Pradesh nung 6, Assam nung 5, Maharashtra nunga 5, Bihar nung pezü, West Bengal nung asem, Manipur nung ana aser Tripura, Jammu & Kashmir aser Chhattisgarh shia nung menden kaka atema election agiogo.

Iba dak alia Arunachal Pradesh nunga assembly menden 60 aser Sikkim nung menden 32 atema assembly elections agir.

Hokolbarnü agiba Lok Sabha menden 102 nung 2019 küm Lok Sabha election nung NDA-i menden 41 aser Congress-i aniba UPA teloktepi menden 45 ngua liasü. Ajsüaka taküm election nungbo delimitation dak sendakba nung menden trok agienogo.



April 19, 2024 nü Nagpur nung BJP candidate, Nitin Gadkari aser pa kinüngtsü nati vote agütsüba sülen vote agütsüba temaitsü sayudang tangokba noksa nung angur. Union Minister Gadkari-i Nagpur Lok Sabha menden nungi toktep.

# Air India-i April 30 tashi Israel tashi senzüba tayimtsü ajak nokdang

**New Delhi, April 19 (Agencies):** Israel aser Iran na tsüngda anemtepa Middle East nung tensa tamajungba akümba dak sendakba nung Air India-i Israel tashi senzüba tayimtsü ajak nokdangtsü telemtetba agiogo.

Israel-ia mangyanga Hokolbarne Iran nung tesem ka maakogo, ta osang prokba sülen Air India-i iba telemtetba agi.

Gaza nung rara densema Middle East nung tensa tamajungba akümba nung ajemdaker Air India-i April 30 tashi Israel tashi senzüba tayimtsü ajak nokdang, ta metetdaksü.

"Middle East nung tensa tamajungba akümba nung ajemdaker onoki Tel Aviv nungi aruba mesüra aoba tayimtsü ajak April 30, 2024 tashi nokdang," ta Air India-i X ajanga metetdaksü.

"Onoki iba tensa maneni

mita reprangdar aser Tel Aviv nungi arutsü mesüra aotsü atema ticket mekazüka aliba passenger tem maneni nungita yaritsü. Air India atema customer tem aser Air India nung inyakertem taküm kümzüksüji onok atema tongtibangba," ta Air India-isa metetdaksü.

Amongnüa Air India-i New Delhi aser Tel Aviv tashi senzüba tayimtsü ajak thinenja liasü. Yaküm October 7 nü Israel aser Hamas tsüngda mezüng rara tenzükba mapang nunga India nungi Israel tashi senzüba tayimtsü ajak thinenja liasü.

Honibarnü Iran-i Israel amakba sülen Lufthansa aser Etihad Airways-ia Israel aser Iran tashi senzüba tayimtsü ajak thinenogo. Emirates Airlines-ia Iran nung airspace paidoktsü atema tanga lenmang dang amshia liasü.



April 19, 2024 nü alima nung dar tatsütila, Jyoti Amge-i Nagpur nung aliba polling station ka nung vote agütsüba sülen tangokba noksa nung angur.

# Delhi CM Kejriwal-i jail nung insulin atema Delhi court dang mepishir

**New Delhi, April 19 (Agencies):** Hokolbarnü AAP tongti lenir aser Delhi chief minister Arvind Kejriwal-i Delhi nung aliba Rouse Avenue court dang jail nung pa nem insulin mozü temelaba agüjang, ta temepishiba ka agütsüogo.

Anogo ka tejaklen Enforcement Directorate (ED)-i, medical bail angutsü mesüra hospital nung amongtsü nükjidong nung Arvind Kejriwal-i pa dak type 2 diabetes keta liaka sugar aketba chiyungtsü anogo shia achir, ta aija liasü.

Ano külen AAP MP, Sanjay Singh-i Ato kilonser Narendra Modi aser Bhartiya Janata Party aija, parnoki Delhi CM Kejriwal jail nung tepsettsü atema asalentong yanglur, ta aitsü.

"Ato kilonser Narendra Modi aser BJP tetuyuba nung Arvind Kejriwal tepsettsü atema asalentong ka yangludar," ta Singh-i tai tongloksü.

"Arvind Kejriwal ya tesüiba küm 30 tashi diabetes agi shiranger. Pai insulin agir ajsüaka jail nung pa nem insulin magütsür," ta paisa metetdaksü.

MP Singh-i, BJP lenirtemi Arvind Kejriwal shirangba atema asayamenütsür aser pa anema tiyazü osang balala proker, ta aitsü.

"Jail temzüng kübok jail nung alir ka indang health dak sendakba osangtsüsang lemsateptsü memelar süra kechiba ED-i Brihostibarnü osangbenertem den Kejriwal chiyungba dak sendakba osang tai lemsatep?" ta Sanjay Singh-i asüngdang.

Brihostibarnü AAP lenir aser Delhi minister Atishi-ia, jail nung kidang renemba chiyungtsü achitsü aser insulin memelaba ajanga chief minister Arvind Kejriwal tepsettsü asalentong yanglur, ta tai tonglokja liasü.

Brihostibarnü ED-i court dang, Kejriwal dak type 2 diabetes keta liaka medical bail angutsü mesüra hospital-i aotsü nükjidong nung pai titi, somomo mesüra nanglong ama sugar keta aliba chiyungtsütem achir, ta metetdakja liasü.

2021-22 nung Delhi excise policy ken o dak sendakba nung taküm March 21 nü ED-i Kejriwal apu aser tang pa Tihar jail nung lir.



# TIR YIMYIM

## YIMOBILEM (EDITORIAL)

DIMAPUR

KÜPTOKNÜ

RONGCHII 20, 2024

### Asenok melenshitsuago!

**Y**ashi agiba election nungbo akok tashi asenok ajaki indangindanga shilem agitsü asoshi ajungshitepa aruogo. Iba amaji taoba election-tem dang nungibo tajungba, tesünepba aser teindangba tesem aika nung agiba osang angashir. Atangji, election nung ya senso shia pei temeten amshiteta pei vote pei enoktsünüdak enoktsütetba tashi aser tepelaji kanga tulu lir. Ibayongji, election dang ya Democracy benjong ta ajar. Ajisüaka, kodang asenoki asen telokisa koknüdang tangar vote enokdak aruagi pei vote meinoktetsüsa tashiyim amshidir, iba jagi pelatepa democracy benjong amongtsü melen jashitepa amongtsüsa akümer. Aji oda, asenok yimtak yimsüing aser town-tem nung yimsüsür aser lenirtemi nübor tem nem yimten khuret aser mapa angatetdakja pei vote peisasa enokdaksütsüsubaji kanga tongtibang asütsü. Idangji dang asenoka democracy benjongji mongtetsü. Ajisüaka, yashi tashi nung agiba election-tem nung asenok aikati ochishia aser indangindanga shilem magitetba osang angashidang peladi asüyonga mepelateter. Atangji, election ya telok o telok na aser nisung o nisung na tsüngda yimsüsüsür asütsü toktepba mapa ka lir, anungji takok angutsüsubajisa tongtibangtiba. Ajisüaka, takokji koma angu ta asübjiang ano tongtibangba akümer. Ibai angatetsü asoshi asenok tokolok lapoktsü aser shisa aientsü nüngdaker. Aji oda, asenok tokolok aser shisatsü kodang ina nüchi kümdir asenoki meshitak aser meindang mapatem inyaksü nungnangtsü aser akseta bilemetsü. Tangbo asenoki iba jenjangji matong, kechiyong asenoki pei vote aser pei yimten temeten ayoktsü kecha nungnanga mebilemer aser yimkong meyong vote ajena amongtsüsubajia ochi mapa ka inyaker amai bilema inyaker. Kasaji, pi indang proxy vote enoktsütsüa maker. Aji oda, tanübo tanger vote enoki marudaktsüi nokdangba mapatemjiang nokinketer mapa amai kümogo, kechiyong item jagiang yimten tashi amshitetter. Item ajakji asenok nüchi makümba tamaitstütem lir. Itemji asenoki metetsümunga inyakar amato saka metetsümonga inyaker masü, asenok tebang dang ashi temulungjang aser tokolok nüchi makümba agi meshitak aser meindang mapatem shitak amato bilema inyaker. Aji oda, election maparen nung dang masü saka asenok aika auyaba kidang, auyaba süoshi agir auyaba chiyongtsü chiajema alir aser auyaba gari nung senzür saka maker, kechiyong asenok nüchi maküm, anungji taksü mapa o maktsü mapa na mebendangteter. Ajisüaka, asenok yamai dangbo malitsü, kenübo asenoka nüchi akümtsü aser melenshitsu. Idangjibo, asenok asoshia election ya democracy benjong asütsü. Idangjibo, asenok putu yimsüsür aser lenirtemi anir nütsüng nübor ajak menüremtepa pei vote peisasa ajentsü. Idangjibo, election-i aitsü atema sen masü saka nübor tem atema inyaksütsü tangatetba, temetetba aser temulungtetbatemang tongtibangba akümtsü. Idangjibo, nübor tem asoshi yimten yimsüsürtem ki teti lapoka alitsü aser yimsüsürtemi nübor tem nem ango masü ango aputsü tasa agütsütsü aser lenmang sayutsü. Idangjibo, Nagaland gari lenmang nung auyi mapungtsü aser lishia madoktsü. Idangjibo, government meyong kaketrejutem nung kaketshirtem menden agi mata rakteptsü. Idangjibo, government mozü kitemsa tajungba asütsü. Idangji dang lanurtemi parnok kolok amshia chiyongtsü züsentetsü aser Nagaland ya takar aser ochishir lima kümdaktsütsü. Hau, yashi tashi asenoki asenok inyakyim merüktetnüaka mekoki asenoksasa asenok kanga menenogo. Asenok nüchi asünungbo tanübo asenok ya alima tsüngdang akseta lila, saka asenok ano tangatetba nung nüchiso mangu, iba jagi asenoki sarasademer meshitak inyaker aser yimsüsür sü abener tiyazü agi ochi küma jembir saka maker. Ibayongji, asenok tangatetba nung tamongdak ka mamong kümadoker. Ajisüaka, ya alima yimya, kin ka aiendang yamai aiener, anungji asenok rongnunga shirnok tama nüchi kümdir parnokjisa temoatsüba asütsü aser parnok sülen asenoka anidaka melenshitsu.

## OLEMSABANG

### Yangtang Ki

Süpongñüsgang Longkümer  
Darogapathar, Dimapur.

Yangtang ya takümsangnü (Nü tetezü aika melen amshiba (Nu tetezü techanu, Ozü chanu, Ak chanu, Nashe chanu) rongnung ka lir saka kechiba yangtang jatsü? iba yagi ki asübaji ali agi ninang sep amai menoker, aser mezüng mongki ka yanglutsü aser iba nungji mesen menü poka ayur saka timba ka nung Longben süngu sentsü tila kobai kaakaa jajar iba dang akalongben ta ajar aji mongki ka nung ka poktsü aser pai takdang ka nung entsü kokka yutsütsü ano taktang ka yanglutsü iba nungjia longbenji ka penür arua shibangtsü aser entsü kokka yutsütsü yamaji entsü atemaji chiyongtsü pentena shibangyonga ki aika yanglur. Pai pentena ayubaji refrigerator nung chiyongtsü ayu amai saka pai ayubajipo takümsangnü aser Longbenji masür, taküm alir anungji pa aser ki dangji yangtangki ta ajar. Par kiji jungjunga yangtetta ayuba agi yangtang ta ajar. Ibai ninang mesük saka pa temangji ayong tera talang aser ninang amai aika agi masü saka ka agi kisü tenzüker aser oda odapo ninang sep ama aika küma yanglur. Pai rizüngtena ayubajia tesümgangtsüka lir.

Tanü Naga lima tiya reprangtanga küm metsü tejaklen ain tamajung ka amshi ama asen Aor aser Naga nunger yimsüsür tajung aika mapang medongjonge menden nungi tsükdaktsü aser tanü-a yimsüsür tajung aika nokdaka lir sür nung angoi proki meipa (Meyok) ama angüsü koda atsüshir yamaji ango senzüba ama ajak ka küma longjem, longjembaji ken bilemetsübo tajung saka longjemba ama mesüe tashe kanga mait alima telongi alur. Naga lima asoshi factory maka; factory, industry amenoktsüsubaji Train station kong litir idakji alitsüla saka Dimapur aser Tuli ama nung electric power bil po tali meshir nung iron fabrication-a sünga mamshitetter nung tanga district nung koda inyaksü. yangtangi takümsangnü botena shibanng-a ayu ama ya no; Yimsüsüri yamai yimsü sütetbaji nüpur tang timtemer masü kenüpo nüpur ama ali yima alutsü ta metetsüla ljiip lima nung Israel nunger alar tiya nungi jentetta aotang Farao chubai anir ljiip nunger ajak mezüng japasu mangyimba tiya ajuruago. Asenok nuk agi ngudakja India nung khristantem koda rishikangshir, Assam nung khristantem atema kechi renemtsür? Yimsüsüba lenmang nungpo kecha masüar ta tebilema. Tang tashi nung tasuba küm 78 nungi temalen alirtemipo jangja jangja nguogo Assam nung mission centre asem pubaji angazükba agi Satiya koba dang ano Lidu ta-a ja liasü iba Town ji 1950 nung volcano adok saka mission osettem Jober ajanga mepelenma tashi volcano jagi ata aser kodang ajak renamaogo ta ayimoktsü mission centrejia telongi lua samaba tanüpo Satiya Townji tzüje tang küma lir. Nai sen agi ajak alizüka yutetyongbo teti asoshi makoktsü.

Tanü arogotem nung revival akiba ya kanga tajung saka iba asentenshi ya nüpurtem kisüng atema masü Sanükertem aser tenzüker tenzüklatem ajak asoshi, Aser tanüpo asen Aor balaka ajak khristan anungji yimsüsürtema ajak aser yimden yimli asentenshitsu nüngdaker kibong shia asendenshitsu nüngdaker, melenshitsu junger ta bilemra mapang reprangang memelenshitetsü ta angatetra Santem meimang. Tanüla temeshi sempet akartem tanüla sempet jagi arogo nung ajemajema tanüla ania aruba mapa inyaksü mapang lir Tangar lima nung shidakba khrista akartemi tepsettsü rishikangba metsüpue ajemajema lemangji ibai tang ta nokdakba asenoki angur, kobala shimtsü ???

Nüjisu pushirtem tepok chiyongtsü pushir süra teloktelok tettettyonga nü mulung saka alima meimer ta taküm tenla agütsür süra telok ka küma langteper nokdakra jungtisü. Pei kidang nungi masü sünglanglen nungi aitra takok mangur anungji ajaklen nungi asentenshitsu nüngdaka kümaogo. Abram tangatetba, Sodom chubai Abram tang ashi temakzükba oset ajak na akiang, saka kü nembo nisungtem tang kua." Abrami Sodom chuba dang ashi, " Ni tematiba Tsüngrem kibuba anüng ali yanglusang kibuba matsüngdang azüngashiogo, ni nü rongsen angjang ka mesüra tsüngsem lisü kata mesüra tanga kecha makitsü; ashiko nai ashitsü, "ni Abram takar kümdaktsü" Lipok 14: 22-24. Pai ashi ama bei sasa kechi inyaktet aji nananger saka tanü ajung asa inyaker tem abeka maotsü anungji arishi alangtsü asoshi ochi lenmang nung nokdakdi.

Yangtang ki ya lapoka ajak yanglushitsu mapang tongja dongaogo ta ayongzüker.

**Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger angateta agitsü mepishir**

# Myanmar nung Baptist pastor Dr. Hkalam Samson tanaben apu



April 17, 2024 nü Rev. Dr. Hkalam Samson jail nungi chiokba mapang par kinüngertemi pa agizükba noksa nung angur.

**April 19, 2024:** Tawa Myanmar nung sepaitemi Baptist pastor ka jail nungi chiok, ajisüaka mapang tatsüka tsüngda pa ano tanaben puogo, ta Baptist Arogoi metetdaksü.

April 17, 2024 nü Myanmar nung sepaitemi taoba mapang Kachin Baptist Convention (KBC) nung Tir, Rev. Dr. Hkalam Samson den yimtenren tsütsü pua tepuokdak ayur 100 densema nisung 3,303 chioka liasü.

April 19 nü osangbener den jembidang Human Rights Watch's Asia division deputy director, Phil Robertson-i, "Sepaitemi Samson indang organization aser pai yimsü temeden atema inyakbaji tsübur aser sepaitemi Kachin state

azüoktsü merangba nung pa ya amokmeren ka ama züingshir," ta metetdaksü.

Kachin state yimtiba, Myitkyina nung sepaitem aonung 9:00 ako meta Samson'er kidangi aoba sülen pa tanaben apu.

April 17 anepdang sepaitemi pa jail nungi chiokba mapang nung Kachin Baptist Convention nungi züngsemtem aser par kibong züngsemtemi pa aigizüka liasü, ajisüaka kasa aonungjisa pa tanaben apu.

Sepaitemi pastor kinüngtsü aser Kachin nung aliba Peace Talk Creation Group nung züngsema apu.

Phil Robertson-i International organizations dang tangsa Rev. Samson, pa kinüngtsü aser parnok den

inyaksemertem chioktsü atema takhangba agüjang, ta ayongzük.

April 18 nü KBC-isa sangdong ka ajanga, "Onoki pastor aser par kibong atema sarasademjang ta ayongzükogo," ta metetdaksü.

Sepaitemi kechiba pastor tanaben apuar kuli mejangjar, pa tesüiba ita 16 tashi tepuokdak aliba mapang nung temang touzük kanga ajema kümogo, ta Arogoi metetdaksü.

Tang sepaitemi Kachin state azüoktsü nükjidong nung inyaker. Iba state nung Khristan nütsüng million 1.7 lir. Myanmar nung nütsüng million 53.5 lir; iba nungjagi nütsüng shilem 87.9 Buddhists aser nütsüng shilem 6.2 Khristantem lir.

# EU nung tanur raksaba melatsü atema inyakba Khristantemi aitsür

**April 19, 2024:** European Union tesem ajaklen ozüng kübok tanur raksaa indoktsü melatsü atema European Parliament nung bangzüng ka renemba asoshi Khristan putirtemi aitsüogo.

Vatican Pontifical Academy for Life Tir aser Archbishop Vincenzo Paglia-i, "Tanur raksaba ya Catholic Khristantemi dang anemer masü. Tasüngdangbaji- tanur tebok nung alirtemji taküm lidaktsütsü asü? aser parnok tepsettsü atema asenok dak kechi temeden ali, ta asüba onük ka lir," ta metetdaksü.

"Iba (EU nung bangzüng renemba) ya tejakleni aoba mera ka masü saka tesüleni aoba mera ka lir, kechiyong ibaji ajanga nisung ajak temeden, talisa tashimaitertem aser peisasa ola madoktetertem temeden mezüingshir," ta pai metetdaksü.

April 11 nü Member of European Parliament (MEPs)- i EU züngsem linük 27 nung tanur raksaba ya ozüng alema inyakba mapa ka masütsü atema vote agütsütep aser

tanur raksaba nokdangba linüktema aija liasü.

Archbishop Vincenzo Paglia-i, "Iba telemtetba agiba ya no menden nung aliba tanur ka temeden khenyongi mezüingshiba lir," ta metetdaksü.

Federation of Catholic Family Associations in Europe-ia, MEP temi tetsürtem ya yimtenren nung tajangzük atema amshir, ta aitsü.

Federation-isa, "Tanur raksaba onük ya European Parliament tashi kübok mali, kechiyong züngsem linüktemi pei sasep nung ozüng yanglutsü atema tashi agüja lir. Tanur raksaba ya temeden ka masü, aser nisung ka taküm agitsü atema asenok dak temeden mali," ta metetdaksü.

European Parliament nung bangzüngji pusema vote 336 agütsü aser iba bangzüng anema vote 163 agütsü aser Parliament-i marur 39 liasü.

Germany nung tang tashi tanur no menden nung lia raksaba memelar, ajisüaka iba linük nung sorkar commission kati tanur no menden nung lia hopta 12 tashi nungbo indoktsü

melatsü asoshi benokogo aser ibaji Roman Catholic aser Evangelical Khristantem shilem asem nungi shilem anatibo pusemer.

April 13 nü Munich yimti nung "March for Life" sentong nung jembidang Roman Catholic German Bishops' Conference chair, Dr Georg Bätzing-i hopta 12 tashi nungbo tanur raksaa indoktsüji ozüng alema lir, ta aitsü.

Poland linük nunga yimsüsürtemi tanur raksaa indokba melatsü sentong renemba anema April 14 nü Bishops' Conference-i ayongzük "March for Life" sentong agiogo. Iba sentong nungji nisung 50,000 dak temai shilem agia liasü.

European Parliament nung MEP temi vote agütsüba dak sendakba nung Commission of EU Bishops' Conferences secretary-general, Rev. Manuel Barrios Prieto-i, Khristan democracy ta jembiba party tem nungi züngsemtemia iba bangzüngji pusema ajanga European Union nung putirtem jashir, ta metetdaksü.

# ANOGO ABEN TSÜNGREM DEN

## Chiretpera aser anishiba

"Nenok ken am mang liasü saka tang Kibuba nung nenok tesangwa lir. Tesangwa chirtem ama jajaang." Efesa 5 : 8.


Temetetba bendenbaji Tsüngremi menokdang. Saka Pai taküm dang tama temetetba magütsür. Nisungi taküm Süngdong nungi achi asübo Paradise mesamai lila. Saka pai temetetba süngdong nungi achi aser tesama angu. Tsüngrem madenba meimchir temetetbaji tasütsü. Tsüngrem tsübuba nungi shitakba shisatsü angur (A. Shin 1: 7).

Asenoki temetetbaji bendentsüla aser taküm asoshi telemtetba agitsüla. Saka Tsüngremi mulungba bushidang kuli aika bushira lendong lir. "Kü tebilembatem nenok lenmangtem masü" (Isa 55: 8,9). Tebilemtsü indang kuli bushia lemsatepba nung kecha tai mali saka asenok lemtet lenden nung talangka malitsüla. Bilema aruba temetetbaji Tsüngremer lenmang metettsü asoshi teperi masü. Onoki tamang agi jajar, tanguba agi masü (2 Kor 5 : 7). Idangji dang asen lenmangtem nung Tsüngremi pelatsü (t.9).

Asenoki tashi mangar aser aor, saka Abrahama tashi anga aser Tsüngremi ashiba lenmangi ao (Ibri 11: 8). Asen shisatsü sülen aobaji lendong, saka memetetba lenmang nung Tsüngrem dak amangba nung tekümzük lir.

Tsüngrem tamashiji nisung shisa akaba dang nungi shisa takaba; Pa tashi maitbaji nisung tashi aitba dang nungi tashi taitba ta Laishibai ashiba ochi o asenoki mamali.

# Kachin state nung nisung anati Khristan putir ka dak injang khaloktsü



Paul Hkwi Shane Aung

**April 19, 2024:** Taoba mapang nung pa dak injang Hokolbarnü Myanmar nung khaloktsü. Nisung anaji korang Kachin state kübok Mohnyin tanak den mask tanak agir jila nung aliba St. Patrick Catholic Arogo Tenla kidang tekülem sentong tagidak mapang nung mejangjaba nisung anati putir dak injang khaloktsü.

St. Patrick Catholic Church nung putiri sayutsüngi tesüdak mapang nung nisung ana prangpong amer Tenla ki telungi aitba sülen Arogo züngsemtemi repranga lia putir dakji injang asemen khaloktsü, ta yangji alirtemi metetdaksü.

Injang jagi putir Paul Hkwi Shane Aung dak teküm, teka aser tepi nung khashi; pa tasü nungibo kümzükogo saka kanga mejungi yirua lir.

Arogo züngsem kati, "Putiri Lai azüngba sülen sayutsüngiba

mapang nung pa dak injang khaloktsü. Nisung anaji korang tanak den mask tanak agir liasü. Tenla ki telungi aitli parnoki injang khaloktsü, iba sülen Tenla ki telung tom tashi aitba sülen khen akah aser putir tonga aoba sülen ano khen khaloktsü," ta paisa metetdaksü.

Iba sülen nisung anaji jena ao aser putirji Kachin state yimtiba, Myitkyina nung aliba hospital kati emergency treatment atema anir ao.

2021 küm Myanmar nung sepaitemi democracy sorkar atsüngdokba sülen sepaitemi talisa Khristan lenirtem anema inyaker.

Taküm March 18 nüa Kachin state kübok Mogaung jila nung mejangjaba nisungtemi Khristan lenir, Nammye Hkun Jaw Li khaseta liasü.

AO OSHI ANGAZÜKDAK: TANÜ ANGAZÜKTSÜBA OJANG



Tir Yimyim

Süngbentzüta

(n) süng aser tzü abeni aoba mapa ( work for fetching wood and water)
\* Süngbentzüta mapa nung lanurtemi meranga inyaker.

Süngbong

(n) süng aika külemi alentepba ( a bundle of wood)
\* Yimeri tasür kibong nem süngbong kaka bentsü.

OLONG PAITEP # 6762

Grid for OLONG PAITEP # 6762 with numbers 1-18 placed in specific cells.

TIPIEN

- 4. Temin tesülen - 6
6. Khu ayu - 3
8. Shitak masü - 4
11. Shiruru chiyimdak - 5
12. Mapang - 5
15. Tagidak maliba jana - 4
16. Atem merük - 3
18. Tzü jemner - 6

LANGTSÜNGLEN

- 1. Songtem - 3
2. Asora - 5
3. Tzü atsüngtendak - 8
5. Shinga danga memetet - 4
6. Tsük bendenba mapang - 5
7. Mamangi aoksa - 8
9. Chi chiyongba oset - 5
10. Tsüngremer ki - 5
13. Poksütem nungi aluba tzü - 5
14. Chiyungner - 4
17. Alu nung tsük benden - 3

OLONG PAITEP # 6761 TELANGZÜBA

TIPIEN:

- 1. Aben, 4. Artsü, 7. Lisem, 8. Liwa, 9. Sarasadem, 12. Aket, 14. Mangu, 15. Anünü, 16. Ango.

LANGTSÜNGLEN:

- 1. Aruli, 3. Balala, 5. Suwar, 6. Belem, 9. Sүjak, 10. Aonung, 11. Dokan, 13. Tinu.

NAI-A YA METETTER MA

LOWEST LIMBO SKATING OVER 25 METRES



Ahmedabad, Gujarat nungi arishi küm 6 tain Takshvi Vaghani-i Lowest Limbo Skating Over 25 Metres indang otsü tasen ka yanglutetogo. April 18, 2024 nü Takshvi-i iba otsü yanglutetogo aser lai ali nungi 16 cm (6.29 in) dang ajungketa yangluba ajangteta metre 25 tashi skating asü. Guinness World Records-i ashiba agi tesüiba lowest limbo skating over 25 m records ya India tsür ka liasü. Pune nungi Manasvi Visha-i ali nungi 16.5 centimetres ajungketer iba otsü ya yanglua liasü saka Takshvi Vaghani-i ajatetogo.

Assam nung vote enoktsürtemi shilem magii lungkak ait



Guwahati, April 19, 2024

(Agencies): Lakhimpur kübok Dhakuakhana sub-division nung alirtemi Hokolbarnü polling nung shilem magi.

Ghilaguri kübok 144 Ghilaguri Polling Station nung vote enoktsür nisung 825-i election nung shilem magi aser iba ya parnok tejashi sayuba lir.

Yimdaklirtemi yimtsüngi aitba kishi nung hashtag #nobridge\_novote ta ser notice banner ka ayu.

MLA aser MP temi aiben connectivity agütsütsü ta nangzükaka meinyaki dang aruba atema tejashi sayua tan election nung shilem magitsü lemtet ta yimdak taintem kari osangbener dang ashi.

Ghilaguri village den sendakteptsü atema

Charikodiya River nung apu ka temdangtsü takhangba agüja arur saka tesüiba küm 30 tema MLA aser MP shiai ibaji meinyak. Iba ajanga yimdaklirtemi timtem jenti ajurur aser ibaji talisa tanurtem school-i yoktsüba aser manemertem anir senzütsüba nung ajurur, ta Ghilaguri yimertemi ashi.

Lok Sabha election mezüngbuba shilem nung tanep Lakhimpur district nung polling maparen tiptema dang tenzükua liasü. Tanü nikongdang 3:00 ako meta tashi voting percentage 50% shi liasü.

Külen, Dhakuakhana aser Dergaon nung vote enoktsür nisung 1,000 temai election mokdanga liasü.

Dhakuakhana aser Dergaon nung polling booths-i nisung

kangabo maru aser vote enoktsürtemi yimdong nung lungkak aita senzü.

Dhakuakhana aser Dergaon constituency nungi MLA temi mapa meinyakba anema parnoki lungkak ait aser vote meinoktsü.

Dhakuakhana kübok Ghilaguri nung nisungtemi transportation infrastructure majungba indang ashi.

Lennirtemi parnok senzükua yutsüba atema tejashi sayua tanü candidate ka nem danga vote meinoktsü ta parnoki ashi.

Ghilaguri polling station nung vote enoktsür 538 lir saka parnok nsiung kati danga vote meinoktsü.

Dhakuakhana aser Dergaon nung lungkak aitba ajanga nisungtemi MLA tem dang jashiba jungkai adoka sayur.

Manipur kübok polling station kar nung ozüing alema mapa inyak

Imphal, April 19, 2024

(Agencies): Khurai Assembly Constituency kübok Moirang Kampu Saieb nung Polling Station ka nung ozüing alema mapa inyakdang arishi küm 75 tain ka yiru.

Iba polling station-i nisung kar prangpong amer arur polling agents amokmeren aser idangji parnok aridokdang injang khaloktsü ta osang angazüker.

Gari ka nung nisung pungu prangpong amer polling station-i aruba agi lanurtemi parnok noktandang raratep. Idangji parnoki injang khaloktsüdang tambur ka yiru.

Iba nisungji Raj Medicity Hospital-i anir oa anepalu aser

pa tang tajungba lir. Ajisüaka ketdangtsürtemi nisungtemji pua marudang jena oadok.

Iba ajanga nisungtemi tejashi nung Polling Station 3/11 nung election dak sendakba documents raksatsü.

Ano, Moirang nunga Thamanpokpi nung injang khaloktsü saka tia ka nisung yiruyibong asüba osang kecha mali.

Maneni, Khongman, Imphal East nunga polling station ka nung prangpong amertemi vote enoktsütsü merang.

Iba osang angashia iba tesem nung alirtemi National Children's School, Khongman nung lapokba polling station

telungi tur Electronic Voting Machine (EVM) aser Voter Verifiable Paper Audit Trail (VVPAT) machines raksatsü.

Candidate ka nem takok ngudaktsütsü atema prangpong amertemi proxy voting asüba aitsür ta public-i metetdaktsüogo.

Inner Manipur Parliamentary constituency kübok tesem aika nung prangpong amertemi polling station nung timtem agüja liasü.

Thamnapokpi, Iroisemba, Khongman Zone Five aser Moirangkambpu nung lendong balala atalok aser iba dak sendakba nisung asem puogo.

Tripura BJP-i voters noktang; opposition polling agents meindok

Agartala, April 19, 2024

(Agencies): Tripura nung West Parliamentary election nung BJP züngsemtemi voter tem amokmeren aser noktang ta Congress lennir Sudip Roy Barman-i ashi.

Civil aser Police administration-i maparen maziüktet ta taoba Minister aser MLA Barman-i ashi.

BJP pusemba teloktemi voter tem amokmeren aser polling stations-i meyoki lennang noktang ta pai ashi.

BJP züngsemtemi polling stations nung opposition polling agents dak teka sangshi aser meindok. Parnoki tangalen

nungi nisungtem anir arua item mapa inyakdaksü, ta Barman-isa ashi.

BJP pusemertemi lennang nung tenokdangbatem yutsü aser voter noktang. Iba ya tesem aika nung atalok aser polling booths nungi opposition polling agents meindok, ta pai metetdaktsü.

"Congress nem voter enoktsür ajak noktangogo. Democracy kong lir? Asen state nung democracy mali kümogo. Police-i ola madoker aser parnok teinyaktsü meinyak aser vote percentage kanga ajema akümtsü. Onoki ECI, CEO aser tanga ketdangtsür dang shiogo

saka mapa kecha meinyak. June 4 nü iba tensa melenshitsü" ta pai ashi.

"Iba ya Agartala nung ataloker aser tanga tesemtem nungia nisungtemi kasa timtem ajuruba osang kü den lemsateper" ta Barman-i ashi.

Tesüiba mapang Tripura nung fake voting maparen kanga inyaka liasü saka Chief Electoral Officer office ajanga iba ya azüokba atema tenüngsang agütsür ta paisa ashi.

Ajisüaka ketdangtsürtemi parnok teinyaktsü tim meinyakba atema mepelar, ta Barman-isa shisem.

# Donald Trump ken o jembitsü obendangertem shimogo

**New York, Rongchii/April 19 (Agencies):** Taoba US tir Donald Trump indang otsüsütsü ken o jembitsü atema obendangertem shimba maparen tatemleni arur, anungji iba ken o ya Hombarnü nungi jembiteztütsü imlar.

Iba ken o jembia obendang agütsütsü asoshi nüngdaka aliba ama nisung 12 tenangzüktep agiogo aser nüngdakba mapang amshitsü asoshi par trok nübu shima lir.

Trump-i business records tiazi agütsü ta tai tonglokja lir, koba pai magizüker.

Trump-i business empire yangera alidak New York nung ochi obendanger bushitsü ya hopta aika agitsü imla liasü.

Ajisüaka Trump'er teloki tai aputsü melaba tembangba sülen kanga kera obendangertem shim.

Brehostibarnü tebur tenet aser tetsür pongu shimtetba sülen "Asenoki nüngdakba ama jury ngutetogo," ta Justice Juan Merchan-i sangdonga liasü.

Iba ken o ya porn star ka nem ola madoktsü asoshi sen agütsüba nungi tenzük.

Stormy Daniels-i Trump tena tsüngta tesendaktep liasü ta ashiba ola madoktsü mechi la nem 2016 election magidang sen \$130,000 (£105,000) agütsü. Trump-i tena tsüngta tesendaktep kecha meliasü ta ashir.

Sen agütsüba yabo tai masü, saka business records 34 ben tiazi agütsü ta Democrat nungi Manhattan District Attorney Alvin Bragg-i benokba ken o jembitsü lir. Pai aibelen mapa meinyak ta nangzüka lir.

Brehostibar nikongdang court nungi Trump aodang pai osangbener dang item ken o aija züluba printed media articles aika sayu aser iba ken o ya yimtenren tsütsü rangloker inyakba lir ta ashi.

"Ibai kanga tim masü, kanga majung," ta Republican nungbai ashi, shibai November ita White House asoshi Democrat nungi Tir Joe Biden den tokteptsü lir.

"Alima ajungai iba asayamenü repranga lir," ta pai ashi.

Panel nung tan hopta mena aruba züngsem ana Justice Merchan-i meyiba yokba sülen Brehostibarnü jury-selection session nung tetsükdaktsü ajurua liasü.

Juror #2 ya iba panel asoshi shimogo ta tembar aser kinunger temi media osang balala nungi angazükba sülen lai ochishia obendang magütsütettsü ta angatet, ta obendangeri sangdong. Parnoki la dangi messages balala yok tenzük, ta lai ashi.

"Ni ochishia aser indang-indanga obendang agütsütsü ta ni mananger, kechiaser dangari ashiba ajanga courtroom nung

lai telemtetba agiba nung mokongshidaktsütsü tasak asütsü," ta lai ashi.

Justice Merchan-i idangjisa la odaktsü aser iba sülen osangbener temi jurors tem indang osangtsüsang amshiba nokdanga liasü.

La dang masü ano research agiba sülen Juror #4-i pa indang criminal history mali ta tiazi shia alitsü südi ta Manhattan District Attorney's Office nungi lawyer temi ngutet, ta Justice Merchan-i ashi.

Pai 1990s nung political advertisements shisatsüba asoshi apu amai angateter aser pa kinungtsü ya ochimashi mapa inyakba nung shilem agiba atema Manhattan District Attorney's Office-i asüngdangyaa ali südi ta judge-i ashi.

Legal teams aser Justice Merchan den mapang talangka jembishinüba sülen iba juror ya yok.

Indang-indanga ochi obendang agütsütsü mulunga alir nübu maneni nikongdanga bushia liasü. Iba mapang parnoki courtroom-i nisung 96 anir aru aser anü talui par tenet jurors asütsü judge matsüngdang nangzük. Temelen asoshi ano juror tali ka tenangzükba agi aser ano nüngdakba mapang amshitsü asoshi juror pongu Hokulbarnüa bushir.

## Metongshitsür aser Tatok Meshir

Tir Yimyim adok 182, April 14 nü Tapak 2 nung "Mokokchung Police-i miim mozü Shibelena ayoker aser achir 3 apu" ta adokba osang nung Mongsenyimti nunger Imotiba ta adok saka ibaji Mongsenyimti masü saka Changtongya nunger Imotiba liasüta iba osang azünger jangja jangjaa azüngtsü metongshitsür.

Iba osang ya ni Kr. Temjennaro Nagaland Tribune, Mokokchung Correspondent-i aibenlenba lir, anungji iba tezüluba ajanga ni aser ozü Nagaland Tribune ajanga Mongsenyimti nübur aser Mongsenyimti yimden dang tatok meshir.

**Kr. Temjennaro  
Nagaland Tribune,  
Mokokchung Correspondent**

## Pakistan nung Japan nunger mapa inyaker anasa bomb pokloktsü

**Karachi, Rongchii/April 19 (Agencies):** Pakistan south tsütsü rongnendak Karachi yimti nung Japan nunger autoworkers mena aliba van ka anasa takum bendanga agütsür bomb pokloktsür kati pa temang nung alenloka aliba bomb pokdaktsü, aser iba mapang anasa alir nisung asem yiru, ta police-i ashi.

Iba van ya Pakistan Suzuki Motors aliba industrial area kati oyaa liasü, kong Japan nunger nisung pongu ya mapa inyaker, ta yangji aliba police tanishir Arshad Awan-i ashi.

Hokulbarnü iba lendong atalokba nung Japan nungertem meyiru aser nisung asem yiruba ya mozü kidang temang tajungba nung lir, ta Awan-i ashi.

Pakistan nung China-i senotsü indoka project balala inyakba nung bendanger arua mapa inyaker dak amaktsü akok ta osangtem angazükba sülen iba bullet-proof van nungya security guards ana dener senzüa liasü.

Takum bendanga agütsür bomb pokloktsür ka motorcycle nung arua pa temang nung alenloka aliba bomb pokdaktsü aser ano ka police temi meita aoba mapang khaset, ta police-i ashi.

Police temi kanga kera telangzüba agütsüba ajanga lendong agütsütsü aliba tasa raksatsü, ta police tanishir Tariq Mastoi-i ashi.

Karachi nung iba lendong agütsüba atema shingaia tenüng agia mali. Karachi ya Pakistan nung yimti tulutiba aser Sindh province indang yimtiba lir.

Japan nunger mapa inyaker dak tenük yoker amakba atema Pakistan Tir Asif Ali Zardari aser Ato Kilonser Shehbaz Sharif-i aitsü.

"Japan nunger par ponguprong takum kumzüka lir. Ajisüaka parnok den aliba private security guard ka yiru," ta Deputy Inspector General (DIG) East Azfar Mahesar-i ashi.

"Japan nunger ya Zamzama, Clifton nungi parnok alidak tesem nungi Export Processing Zone bushia aodang iba lendong ya atalok," ta pai ashi.

Taoba mapanga telungpur telok temi Pakistan nung China-Pakistan Economic Corridor (CPEC) dak sendakba project tem nung inyaker China nunger dak tenük yoker lendong agüja liasü.

China ya Pakistan asoshi tembar tajung linük ka lir aser CPEC infrastructure project nung sen billion \$62 indoka lir, kong southwestern China aser Arabian Sea nung Gwadar port sendaktepba highways tem yanglur.

March ita Khyber Pakhtunkhwa province kübok Besham yimti anasa takum bendanga agütsür bomb pokloktsür kati gari sünga tapoktsü oset bener arua convoy ka nung atsük aser iba mapang China nunger nisung pongu aser parnok driver Pakistan nunger ka asü.

Parnok ya Islamabad nungi Dasu-i aorba liasü, kong China nunger company kati hydroelectric dam ka yanglua liasü.

## UN nung Palestine züngsem akumtsü merangba US-i magizük

**New York, Rongchii/April 19 (Agencies):** Brehostibarnü UN-i Palestine ya linük ka ama kumdaktsütsü merangba anema Security Council nung United States-i vote agüja Palestine nunger iba world body nung züngsem akumtsü memela.

Züngsem 193 aliba UN General Assembly dangi State of Palestine ya züngsem ka kumdaktsütsü asoshi draft resolution ka yokba US-i veto asü. United Kingdom aser Switzerland iba voting nung shilem magi aser tanüngba council züngsem 12-i mulunga vote agütsü.

"United States ya maneni tow-state solution nung akang-akanga nokdaka lir. Iba vote ya Palestine nunger nem linük balaka agütsütsü memulunger masü, saka party tem tsüngta indang-indanga jembishinüba nungi dang arutsü ta sayuba lir," ta Deputy US Ambassador to the UN, Robert Wood-i council dang ashi.

Kasa mapang Palestine Tir Mahmoud Abbas-i sangdong ka nung US veto ya aitsü aser ibai tim yimya masü aser kuli tejangja maka ta ashi.

Vote agütsüba sülen Palestinian U.N. Ambassador Riyad Mansour-i council dang temulung shiranga, "Iba pangzüng magizükba ajanga ozü tejangraba meraksatsütsü aser ozü temulungtetba nung tamakok majurutsü. Onoki

maneni merangtsü," ta ashi.

Gaza Strip nung Israel aser Palestine nunger telungpur Hamas tsüngta ita trok buba rara arudang Palestine-i UN nung züngsem akumtsü ya meranger. Ano külen Israel-i occupied West Bank nung settlements ulushia aor, koba ozüng alema lir ta UN-i züngshir.

United States-i veto asüba atema Israel indang foreign minister Israel Katz-i tenüngsang agütsü.

Iba pangzüng bhukuma vote agütsüba council züngsem 12 den jembidang, "Nenok vote ajanga Palestine nunger

magizükba tali ulushitsü aser yimjung tamakoktsü akumtsü ta ngua jashir," ta Israel indang UN Ambassador Gilad Erdan-i ashi.

Palestine nunger ya non-member observer state ka ama alir, koba UN General Assembly ajanga 2012 nung mela. Saka UN züngsem akumtsü asoshi Security Council ajanga agizüktsüla aser General Assembly nung shilem asem lemsar shilem anati agizüktsüla.

Palestine nungeri West Bank, east Jerusalem aser Gaza Strip nung state ka aginer, aser item tesem ajak ya Israel-i 1967 küm amokbang.

## Thailand & New Zealand rongsenketzüng tesendaktep akangshitsü nangzüktep

**Bangkok, Rongchii/April 19 (Agencies):** Küm 11 tsüngda New Zealand leniri tang mezüngbuba Thailand semdangba mapang linük ana yagi Bodhbarnü rongsenketzüng nung tesendaktep akangshitsü atema nangzüktepogo. 2045 küm tashi nungbo shishilemba asemsü agi tali kumdaktsütsü nükjidong nung iba tenangzüktepba yangluogo.

New Zealand Ato Kilonser Christopher Luxon Bodhbarnü Bangkok tonga ao aser Thai Ato Kilonser Srettha Thavisin den Bodhbarnü government house nung ajurutepa liasü. Tenati shishilemba, education, investment, visa arrangements, tourism, transnational crime aser

cybersecurity dak sendakba nung onük balala benoka sensaksemogo.

"Onoki Thailand-New Zealand tesendaktep ya 2026 küm mesüra iba masü dang strategic partnership jenjangi ajungkettsü mulungtepogo. Iba ya lenla ajak nung tesendaktep akangshitsü aser atsülangtsü atema tamendakdak ka asütsü," ta Srettha-i ashi.

Luxon-i ashiba agi, küm 20 tejakdang free trade agreement nung sign asüba sülen linük ana tsüngda shishilemba asemsü agi timba kümogo.

"Ajisüaka tanü linük na tsüngda rongsenketzüng nung tesendaktep atsülangtsü atema maangka tali aser tasen

bushitsü asoshi tali bendanga agütsüshio. 2045 küm tashi nungbo linük ana tsüngda shishilemba asemsü agi timba kumdaktsütsü asoshi nükjidong ayuba onoki sangdonger," ta pai ashi.

Linük ana prongla nungi business delegate tem PM ana lenisüba nung senden ka mena liasü, koba rongsenketzüng nung tesendaktep akangshitsü nükjidong nung ayongzükba lir.

Lenir ana yagi ashiba agi, January 1 nü nungi tenzüka Thai aser New Zealand import tem ajak tariff magi idaktsütsü asoshi yongya atar. Tenatisa Thailand aser New Zealand na tsüngda visa achayangtsütsü aser linük ana tsüngda tayimtsü

indang indanga senzusenpong wara poktetba ajanga shibanger aliba lapokshitsü mulungtepogo, ta ashi.

Osangbenertem den sensaksem masü tsüngda lenir ana yagi achayanga, education nung tesendaktep aser aviation supply, repair aser maintenance atema tenangzüktepba ana yanglua liasü.

Senden nungsa kidanger linük Myanmar nung mepetmesü adoker aliba indang sensaksema liasü. Srettha-i ashiba agi, Thailand-i kidanger linük nung tensa kanga junga asadangdar, kong tawa Myawaddy jila nung telungpur aser military sorkar sepaitem tsüngda raratepa liasü.

## Germany manager Nagelsmann contract 2026 tashi atsülanger



Julian Nagelsmann ya German national football team nung manager ka ama 2026 World Cup alema inyaksü contract atsülangogo.

**Berlin, Rongchii/April 19 (Agencies):** Germany football national team manager inyaksü atema Julian Nagelsmann contract 2026 World Cup alema atsülangogo.

Arishi küm 36 tain Nagelsmann yagi September 2023 nung Hansi Flick melen aser pa lenisüba kübok asaya trok asayaba nungi asem nung takok ngua lir.

Pai taoba mapang contract zülutepa aliba ya Germany-i Euro 2024 ayongzükba sülen July ita tembangsü liasü.

"Iba telemtetba ya temulungjang nungi agi. National team ka nung coach inyaksü ya konang tulu," ta

Nagelsmann-i ashi.

2026 World Cup nung shilem agitsü asoshi qualifier ano metenzük, koba USA, Canada aser Mexico linüktem nung ayongzüksü lir.

2016 küm nungi Germany ya tongtipang asayamung nung last 16 alema metoteter aser taoba World Cup ana nunga group stage nung tsük aser Euro 2020 nunga first knockout phase nung England-i tsükdaksü.

Euro 2024 nung Germany ya Scotland, Hungary aser Switzerland den telok ka nung lir. Nagelsmann ya taküm Bayern Munich-i meyipa arua Thomas Tuchel melentsü osang kar liasü.

"Linük nung European Championship asayaba alema Julian Nagelsmann ya national coach alitsüba ya DFB aser national team asoshi signal tashi tait ka lir, kechiaser Europe kübok club tulu aikati pa aginer," ta German football association (DFB) tir Bernd Neuendorf-i ashi.

"Anungji tangbo European Championship nung takok ngua shilem agitsü atema dang ajaki temulung agütsüsüla."

International friendlies ana asayaba nung Germany-i France aser Netherlands madak takok ngua lir, aser Euro asoshi renemshia Ukraine aser Greece den June ita asayatsü.

## Paris 2024 atema shooting nung tenüng sangdongtsüla: Jaspal Rana



**New Delhi, Rongchii/April 19 (Agencies):** Paris Olympics atema Indian shooting contingent tenüng tang tashi magütsüba atema pistol khashishir nübu tejen Jaspal Rana-i tebilemtsü akaba lemsatep aser shimtetba shooter tem renemshitsü mapang kanga ajema angutsü ta ashi.

US aser Italy aser Europe nungi linük aika densema linük balalai Paris Olympics nung tokteptsü asoshi shooter tem tenüng sangdonga renemshiba mapang lir, aser India nunga it aka jungnüa exercise Hokulbarnü tenzükogo.

Pistol aser rifle category nung top 5 ranked shooters tem trails pezü agitsü - April 19-27 (New Delhi, trials 1 & 2) aser May 10-19 (Bhopal, trials 3 & 4) - aser iba sülen ang Paris

atema nübu shimtsü, anungji training phase tatembangba agitsü atema senti mapang tera dang anüngtsü.

Paris Olympics ya July 26 nungi tenzüksü.

National Rifle Association of India (NRAI) ajanga shotgun events nung trials tembangogo, saka Hokulbarnü Doha nung tenzüksü aliba Final Olympic Qualification Championship nungi Paris quota kar danga ngutettsü teimla nung squad mesangdongi lir.

"Alima nung dangartem anguba ama kasa category nung asenok training aser terenemshiba mali. Parnok (shooting asaya nung tajung linüktem) team tem shimteter training tenzükogo aser asenok ano meshim," ta Padma Shri aser Arjuna Award angur

shooter Rana-i NRAI sentong aitsü.

"Shiba aotsü aser shiba maotsü shingaia tang tashi meteta mali. Iba yongji quota ngur aliba asayartem nem tebilemtsü tali agütsür, aser quota mangu alirtem tebilemtsü kanga ajema lir," ta Asian Games nung gold medal pezüben ngur alisang aser tang Olympian Manu Bhaker indang coach Rana-i ashi.

Shooting nung linük asoshi shooter temi quota ajangteter aser federation ajanga trials, national aser international competitions nung ajemdaker nübu shimer.

Trials pezü alitsüba ya tera tali ama Jaspal-i bilemer aser anisüngzüksü atema mapang peria magütsür ta ashi.

Manu aser Asian Games gold-medallist Esha Singh na trials ti nung shilem agitsüla, kechiaser tena ya 10m air pistol aser 25m rapid-fire events nung tokteptsü.

"Shooter tem ajak atema renema alitsüla, saka ibai tera tali lir. Parnoki (NRAI) national aser international competitions nung anguba scores tem kar trial scores ama amshitettsü. Nenoki dang inyakti süra inyaktettsü," ta pai NRAI dang ashi.

## Wrestling: Deepak Punia aser Sujeet Kalakal na Asian qualifiers nung madentsü

**Bishkek, Rongchii/April 19 (Agencies):** Bishkek nung aliba Asian Olympic Qualifiers nung India nunger wrestler tem asoshi tejashitsü aser takoksa tulu ka ajura linük nungi melangteper tajung ana, Deepak Punia aser Sujeet Kalakal nati continental asayamung nung shilem magitettsü, kechiaser Dubai nung tzüngsang majungba mechi parnok mena aliba tayimtsü ya menur Kyrgyzstan yimtiba tonga aru aser mapang shidak nung weigh-in mesütet.

Tzünglu kanga sashia arua tzümetsüng adokba ajanga Punia aser Sujeet ya Dubai international airport nungi maruteti lir Bishkek ya tongtet, saka mapang shidak nung mandatory weigh-in (temang tuozük asadangba) atema maru, ta osangtem ajanga ashir.

Indian coaches temi mepishiaka organiser temi menur weigh-in asütsü memela ta osangtem ajanga ashir.

Tokyo Games nung tera agi medal mangusang Punia (86kg) aser Sujeet (65kg) na Asia Olympic qualifiers - Paris Olympics aser second-last

qualifying event - nung shilem agitsü asoshi Bishkek-i aodang airport nung tzümetsüng adokba ajanga Dubai yutsür aoba tayimtsü timba athi mesüra menu.

Dubai nung tzünglu ajanga timtem bener arutsüba mechi tena den Russian coach Kamal Malikov aser physio Shubham Gupta nunger ya atem nung mejang aser chiyongtsü shidak achi-ajem mesüi liasü.

"Parnok April 16 nungi Dubai airport yutsür moteti yangji liasü aser Paris Olympics atema qualify asütsü atema parnok maongka ajema aor, kechiaser parnok asüng melangteptsü lir. Parnok Bishkek-i aotsü tayimtsü kata mangur. Ni parnok atema shisabolur," ta Sujeet tebu Dayanand Kalakal-i Brehostibarnü osangbener dang shia liasü.

Punia aser Sujeet ya April 2 nungi 15 tashi Dagestan, Russia nung training agia liasü aser Dubai ajanga Makachkala nungi Bishkek-i aotsü telemtetba agi.

Paris atema qualify asütsü asoshi maongka tatembangbaji May ita Turkey nung World Qualifiers ya alitsü.

## Kumar Sangakkara-i Assam nung lanur cricketer nem shisa agütsüsü

**Guwahati, Rongchii/April 19 (Agencies):** Assam nung cricket asayatsü janra alirtem Sri Lanka nunger cricket asayar tejen Kumar Sangakkara nungi shisatsü angutsü yongya renemshiba mapang lir.

Taoba mapang Sri Lanka nunger wicketkeeper-batter ya May 16 nü Guwahati nung under-16 aser under-19 cricketers teshimtet telok ka nem mentoring session agütsüsü sentong lir.

Iba sentong ya Assam nungi tarutsü putu nung cricket asayar tajung anitettsü aser ajungmesotsü nükjidong nung Rajasthan Royals-i animesoba lir.

Assam nungi Riyan Parag ama cricket asayar tajung adokba ngua Sangakkara anir arutsü telemtetba ya agi.

Rajasthan Royals CEO, Jake Lush McCrum-ia region nungi iba mesük takok otsü yanglutsü asoshi parnoki bilema aliba lemsatapa liasü.

"Onoki Assam nungi iba ama asayar anitettsü tejangraba lir," ta McCrum-i Guwahati semdangba mapang ashi.

"Kumar Sangakkara den

mentorship sessions agiba ajanga lanur cricket asayartem nem tajungtiba nungi angazüksü maongka balaka agütsüsü aser pei sempet tajungba akumtsü. Iba ya asaya (cricket) nung aintsü aser terenlok asoshi tajangzük tulu asütsü."

Guwahati ya Rajasthan Royal indang 'second home' lir aser yangi parnoki Indian Premier League (IPL) match ka May 15 nü Punjab Kings den asayatsü aser May 19 nü Kolkata Knight Riders den asayatsü.

Guwahati nung taoba küm IPL match ana takok ngua asayatetba sülen taküm May ita nunga IPL match ana Assam Cricket Association (ACA) stadium nung Rajasthan Royals asoshi home matches ama asayatsü.

Rajasthan Royals pur Guwahati nung Punjab Kings den home match mezüngbuba asayaba repringtsü asoshi BookMyShow nung ticket ayok tenzükogo, ta April 18 nü sangdong aser ticket ya sen 1,000 nungi tenzüksü aser kaketshir asoshi sen 500 agi alitettsü.

## BILEMDANGANG

"Peria akartemi sensakertem tim atemba mangateter."